

SATIACOJA ESOHUI ETEHUE'YO

1 SANTIAGO

Satiacohua esohui quea bihui nee tehue canaje Jesusaja epeeji cuana huasijje

1 ¹Epeeji cuana, eyaya jiquio esohui quea bihui nee tehueaña miquianajaya ebajji, ma ojjaña Jesusaja epeeji cuana ojjaña meshijo ba'eja ebajji. Eya Satiaco bajjani. Eyacuiñajjiya, esejaya Emeshi Mese nei Jesosa Quitohua pea'aiya eya huoojea canaje ojaya esohui huohuiya. Jamajjeya eyaya quea bihui nee chacoaña onijje.

Eyacuiñajjiya Jesusaja epeeji cuana jjabahuejja meequi cani

²Ecua epeeji cuana, ¡shajja'ajjacue mo! Miquianajaya eba'ejji quea camaja poanijo, jamatii ¡a'a quea yeno pojji! Chojja, quea bihui nee pocue jama ba'a: —E'e, Eyacuiñajjiya quea pame nee acani. Ohuaya eya jjashahuabaqui mee cani.

³E'e, miquianajaya eba jama ba'a: Eba'ejji quea camaja poanijo Eyacuiñajjiya eseya jjashahuabaqui mee cani Jesosa Quito nijje quea pame nee ejjapeequijji. Jamajjeya miquianaya yeno'ama Jesosa nijje jjapee tiitiiquije'yo quea ja'a nee nee. ⁴¡Jesusaja epeeji quea ja'a nee po tiitiicue! ¡E'e jojo nei pocue! Jamajjeya Jesusajo jjashahuaba tiitiiquianijo Eyacuiñajjiya miquianaya quea ja'a nee ba'e mee caje mimishi'ama, apoa epo jayojja pea'ai.

⁵E'e pojja'a miquianajaya ba jjima Eyacuiñajjiyo eba'ejji. Jamajjeya ¡Eyacuiñajji nijje mimicue ojaya ejjashahuabaqui'yojji ebajji! Ojaya miya etecueajji pojjeama. Miya quea jjashahuabaqui ja'a po mee caje, o jayojjaya. Joya ecua miyaya huohui'ajjaña jama saja'ameya aje mi acaje'yo quea bihui nee nee ojjaña cuana ojaya quea jea nee neejo. ⁶Jamatii Eyacuiñajji nijje mimianijo ¡jjashahuabaquicue quea pame nee! Jama ba'a: —Jiquio ecua eya onijje mimiani jamaya acaje'yo e'e jojo nei Eyacuiñajjiya.

A'a jjashahuaba taiquijji jama ba'a: —E'e pojja'a jiquio ecua eya onijje miminaje jamaya Eyacuiñajjiya e'ajji pojjeama.

¡Bacue! Joya quea jjashahuabaqui tai poani enashajo poani jama. Jiquio ecua beniya enashajo dojo cani oe miji yasijje, quijje pea miji yasijje dojo ca

o'oyani jamaya oya cuana Jesosajo quea ja'a jjashahuabaqui jjima. Peapea jjashahuabaquime oya cuana poani. ⁷Jamaya jjashahuabaquianijo quea tai; Eyacuiñajjiya oya cuana shajja'ajja jjima jayojja jama acaje. Jamajjeya jamaya jjashahuabaquianijo ja'a jama pojji ba'a: —Eyacuiñajjiya ma e onijje miminaje shajja'ajja cani. Eya ba'e meesahua caje pea'ai —a'a jamaya e'a caje poso jjabaquijji! Eyacuiñajjiya eshajja'ajjajji pojjeama miya. ⁸E'e, Jesosajo quea quehua jjashahuabaqui majje quea pame eba'ejji pojjeama tii tii.

Aema' cuana joya ecua quea aquiana huiso jama

⁹Jesosaja epeeji aema' cuana, dejja etii pojjeama pea'ai quea bihui nee capoahua Eyacuiñajjiya oja mimishi cuana cuijea ca'yonajejo. Oya ba cani epeeji quea aquiana huiso jayojja, oya jayojjaya ba cani. ¹⁰Jesosaja epeeji quea aquiana huiso quea bihui nee capoahua pea'ai, jamatii ojaya aquiana cuana chama' poajo. Joya quea aquiana huiso shasha jama. Nequi tiitii ajja. Chama'yo tii poaje'yo. ¹¹E'e, jiquio ecua eshequi jaasohuajo quea quiyo nee nee poajo sipone joca'yani, yaa'yo majje ojaya shasha jjahua'amaqui yani, majoya aje huojojojeani jama jayojjaya joya aquiana huisohuiso cuana poani. Aquiana cuana chicha majamaja cani tii oya cuana manaje'yo, chama'yo tii poaje'yo. Jamajjeya ojjaña Jesosaja epeeji cuana quea bihui nee capoahua Eyacuiñajjiya oya ba cani pea cuana jayojjaya. E'e, aema' cuana Eyacuiñajjiya ba cani pea cuana jayojjaya, joya quea aquiana huiso nee jayojjaya. Joya quea aquiana huiso ca ca ohuaya ba cani aema' jayojjaya.

Eba'ejji quea camaja

¹²Jesosaja epeeji quea pame nee eshahuaa iyaa cajje jjashajja'ajjaqui ajja poaje; quea mimishi po sa po'yo ajja poaje. Ohuaya Eyacuiñajjiya esohui jayojja jama atiitii cani. Jamajjeya joya cuana quea bihui nee nee capoahua! E'e, Eyacuiñajjiya huohui ca poa jama ba'a: —Eya ojaya quea jea nee nee poanijo, ecuea epeeji cuana ecuea esohui pajea'yo ajjajo eyaya oya cuana ba'e tiitii meeje'yo enijje eyajo.

¹³Mimishi amajje, quea tai jjashahuabaqui majje pea'ai beca cuana sijje poani jama ba'a: —Eyacuiñajjiya eya quea mimishi po mee cani —jama ohua acani posoya jjabaquiani.

Chojja, de. Ma miyame tii ca mi ca quea mimishi. Eyacuiñajjiya ca ca mimishi a'ajja nei nei. Jamajjeya ohuaya eseya quea mimishi epo meeji pojjeama nei nei. ¹⁴Ojjaña aje oe quea mimishi po sa poanijo quea mimishi poani ojaya ejjashahuabaqui'yojjijo. Joya ecua oya jjashahuabaquiani jama quea mimishi po meeya poani. ¹⁵Jamajjeya quea mimishi jjashahuabaqui majje mimishi acaje'yo. Mimishi amajje manaje'yo. Majoya Eyacuiñajjiya mimishi cuana quea nee nee po mee caje'yo tii tii quea mimishi poanaje jojoya.

¹⁶Ecuea epeeji cuana, ¡shajja'ajjacue mo oe! ¡A'a quea quehua jjashahuabaquijji Eyacuiñajjiyo! Ohuaya ca ca oe eseya quea ja'a nee po

meesahua cani. ¹⁷Ohuaya, eseya Chii aiya yahuajo nei nei ojjaña aquiana eyajo nequi pana ca poa: eshequi, ba'i, majameta cuana pea'ai pana ca poa. Oya cuana quijje quea misi poaje'yo. Eyacuiñajji ca ca oe, chojja. Jiquio ecua oya jjeja nei nequi jama tii tiia nequi tiitii poquije. Ohuaya eseya quea pame nee nee acani. Jamajjeja ohuaya eseya ojjaña aquiana pame quia cani e'e jojo nei. ¹⁸E'e, Eyacuiñajjiya ojjaña eseya babaca canaje ojaya epeeji nei epoji. Ohuaya esohui e'e nei huoojea canaje esejaya ebajji. Jamajjeja eseya Jesosa nijje jpapeequi meesahua cani. Eseya ca ca ojaya quea boti nee nee poani; pea aquiana cuana oja pana ojaya iye botiboti poani.

¡Eyacuiñajji esohui shajja'ajjacue e'e jojo nei!

¹⁹Ecua epeeji cuana, ¡shajja'ajjacue mo oe! ¡Ojjaña pojjaajo Eyacuiñajji esohui jashajja'ajjaquicue! ¡Mimi jjimahuajo quea ja'a nee jashahuabaquicue pea'ai! ¡A'a quea quene poji; pea cuana nijje a'a quenequene cuajiji! ²⁰Quea quene poanijo Eyacuiñajji ejjashahuabaquiji quea ja'a nee jayojja jama yaji pojjeama. ²¹Jamajjeja ja'a quea quene poji! ¡Ojjaña ejjashahuabaquiji quea tai epoji, quea mimishi pajea'yocue! ¡A'a pea cuana jama ba'eji! Eyacuiñajji eseya ojaya esohui ba meesahua cani. ¡Ojaya esohui shajja'ajjacue; jamaya ba'ecue quea bihui nee! Jamajjeja ohuaya eseya ba'e tiitii mee caje'yo onijje eyajo. ²²Eyacuiñajji esohui shajja'ajja majje jamaya po ajja miquianaya quea tai jashahuabaquiani, quea quehua poani. ¡Eyacuiñajji esohui shajja'ajja majje ca oe shajja'ajja tiitiecuya!

²³E'e, beca cuana Eyacuiñajji esohui shajja'ajja majje jamatii jashajja'ajjaqui ajja poani. Jiquio ecua se ecojjabajji jacojjabaquiani jama poani: ²⁴Eseya ecojja ba majje poquiani. Quijje pishana seya ecojja pajeacuaji yaña: —¿Achajja shai ecua ecojja poanaje? —se poani.

E'e, ecojja ba majje pajeacuaji yaña jama jayojjaya beca cuana poani. Eyacuiñajji esohui quea pame nee shajja'ajja cani. Jamatii shajja'ajja majje pajeacuaji ca'yani. Esohui jayojja jama ba'e ajja. ²⁵Pea cuana ca ca esohui shajja'ajja majje jashahuaba neinei quiani. Pajeapajea'yo ajja poani. Jamajjeja ojjaña pojjaajo esohui ba neinei cani; pajeapajea'yo ajjaajo ma esohui jayojja jama po tiitiani. Eyacuiñajjiya oya cuana mimishi pajea meesahua ca'yani. Quea ja'a nee nee ba'e meesahua cani, quea bihui nee po mee cani pea'ai joya ojaya esohui jayojja jama ba'yanijo. ²⁶Beca cuana aje oe jashahuabaquiani jama ba'a: —Eya Jesosa Quitoja epeeji poani —jama posoya jabaquiani. Jamatii quea mimishi, quea mimijjequiea mimi tiitiani oya cuana Jesosa Quitoja epeeji pojjeama. Chojja, epeeji nisho poani.

²⁷Eyacuiñajji esejaya Chii ai jama poanaje ba'a: —¡Ecua epeeji e'e nei cuua e'e jojo nei enijje jpapeequianiya quea pame nee ca'a cahua! Jama ba'a: ¡Esho'i echii mano'yo catii mee cahua quea pame nee! ¡Epona e'ahuemano

quea yeno poani caba'e meesahua cahua quea pame nee pea'ai! ¡Eshahuaja epeeji quea mimishi jayojja jama a'a pojji! —acanaje eseja Chii aiya.

¡Ojjaña cuana quea boti nee acue!

2 ¹Ecuea epeeji cuana, ¡shajja'ajjacue mo oe! Esejaya Emeshi Mese nei Jesosa Quito quea pame nee nee poani, quea ca'a nee nee poani pea'ai. Miquianaya onijje jjapeequianijo, jamaya pocue ba'a: ¡Ojjaña Jesosaja epeeji cuana pea jayojjaya acue! Jamajjeya ¡quea pame jjashahuabaquicue ojjañaajo, aquianajjiyo, aquianama' cuanaajo pea'ai! ²Jama ba'a: E'e pojja'a Jesosaja epeeji aquianajji Eyacuiñajjiya equi yasijje dobiquiani. Ojaya eme' bajji mei huo'o quea nahue, ojaya daqui quea nahue ehusho ba'e pea'ai miquianaaya baña. Majoya pea epeeji aema', daqui chijji Eyacuiñajjiya equi yasijje dobiquiani. ³Miquianaya quea mimishi jjashahuabaquiani. Jamajjeya joya quea aquiana huiso nee quea boti aña jama ba'a: —Ma'aje, jiquio e'anioqueji quea pame nee. ¡Jiquiojo anioquecue! —aña.

Aema' nijje ca ca miquianaya jama poani ba'a: —¡Comajo tii ca miña nequicue! ¡Quea huesha anioquecue pojja'a! —jamaya miquiaa ajje aema' cuana quea bicho poani. Jamaya quea tai.

⁴Miquianaya peaja aquianajo jjashahuabaquiani; jjaniñebaquiani jama ba'a: —Joya quea aquiana huiso quea pame poani. Aema' ca ca quea tai, cajaa —jamaya miquianaya quea tai jjashahuabaquiani.

⁵Ecuea epeeji cuana, ¡shajja'ajjacue mo oe! Eyacuiñajjiya Jesosaja epeeji cuana aema' cuana babaca canaje Jesosaja epeeji nei cuana epojji. Ohuaya huohui canaje jama ba'a: —Ojjaña joya ecuea esohui jayojja jama acani enijje nequi meeje eya ojjaña huoojeajji poaje —jamaya Eyacuiñajjiya huohui ca poa ojjaña joya Jesosa quea boti nee ajji poani.

⁶Jamatii miquiaaya aje oe aema' cuana quea bicho po meeña. ¿Ache dejja cuaa shai sohuinano huoojea cani mi dojuhua emeshi meseja etecueajji? ¿A'a aema' cuaa? Chojja. Bejjojjiya ca mi ca miquianaya napa mee cani. ⁷Ohuaya Jesosa Quito niñeba cani pea'ai. E'e, oya Jesosa Quito quea pame nee nee Eyacuiñajjiya huoojea canaje ese jaahuanaa. Jamatii mimishi cuaa oya niñeba cani.

⁸¡Miquianaaya Eyacuiñajjiya esohui jayojja jama acue! Yahuajo ohuaya huohui ca poa jama ba'a: —Miya quea bihui nee ba'e sa poani. Jamajjeya ¡pea cuana quea bihui nee ba'e meesahuacue quea pame nee pea'ai! Jamajjeya ¡ojjaña cuana quea boti nee acue!

Jamaya e'e jojo nei añaajo miquianaya quea pame nee poani. ⁹Jamatii miquianaaya aje oe dejja quea aquiana huiso nee cuana quea jea aña. Aema' cuana ca ca quea bicho po meeña. Jamaya quea mimishi, Eyacuiñajjiya esohui jayojja jama pojjeama. Jamajjeya ohuaya miquianaya tecuea cajeyo ojaya esohui jayojja mi añaajo, ma etiquiana Moisesiya tehue ca poa jayojja jama miya mi ajo. ¹⁰Moisesiya etehue'yo quea huiso nee poa. Ojaya esohui etehue'yo oe

nei ajjimajo miya shajjama' poani, ojjaña ojaya esohui etehue'yo ajjima amajje. ¹¹E'e, Eyacuiñajjiya Moisesi tehue mee ca poa jama ba'a: “¡A'a pea cojjoji pojji!” Ohuaya tehue mee ca poa jama pea'ai ba'a: “¡A'a pea quecua'yojji!” Jamajjeya joya pea quecua'yojji poani quea tai nee nee poani, jamatii pea cojjoji pojjeama poani. Eyacuiñajjiya esohui etehue'yo pajea ca'yani.

¹²Jamatii Jesosaja esohui jayojja jama añajo ca ca eseya mimishi'ama poani. Ma esohui jayojja jama añajo Eyacuiñajjiya eseya etecueajji pojjeama. Jamajjeya ¡Jesosaja esohui jayojja jama atiitiicue quea pame nee! ¹³Quijje Eyacuiñajjiya ojjaña cuana sosequia caje'yo ma ecua oya jiquio meshijo ba'enaje jama sosequia'yomeya acaje'yo. Ojjaña joya pea cuana nijje quea bei poanaje Eyacuiñajji onijje quea bei poaje pea'ai. Joya pea cuana nijje quea bei pojjeama poanaje ca ca Eyacuiñajjiya tecuea caje'yo. Jamatii Eyacuiñajji quea mase pojjeama. Ohuaya ojjaña mimishi cuana pajea mee'yo sa acani, quea nee nee ese po mee sa po'yo ajja.

¡Jesosaja epeeji cuana quea pame caba'e ca'yahua!

¹⁴Ecuea epeeji cuana, ¡shajja'ajjacue mo oe! Beca cuana jama poani ba'a: —Eya quea pame nee nee, eya Jesosaja esohui jayojja jama poani —poso jjabaquiani.

Jamatii oya cuana Jesosaja epeeji pojjeama jayojja jama ba'yani, quea pame pojjeama. Jamajjeya ¿a'a Eyacuiñajjiya ojaya mimishi cuijea caje'yo? ¿A'a onijje ba'e tiitii mee caje'yo eyajo? Chojja de, ¡quea pame ca'a cahua pea'ai! Quea pame pojjeama ba'yanijo ca se ca oe emimijeajji eseya mimijeani jama ba'a: —Eya Jesosaja epeeji poani.

¹⁵Jamajjeya jama jjashahuabaquime pocue ba'a: Yani pojja'a Jesosaja epeeji cuana beshahua nei daquima', quea shoe pea'ai pojja'a. ¹⁶Joya aema' cuana pojja'a miquianaaya huohuaña jama ba'a: —¡Quea bihui nee pocue! ¡Huoe'ama, quea jejje pocue! —jamaya pojja'a miquianaaya oya aña. Jamatii quea dejja taiya jjejojo miyaya bobi, daqui pea'ai mi quiaña. Jamaya po ajjajo ehuohuijeajji miquianaaya aema' huohuaña jama ba'a: —¡Quea bihui, quea jejje pocue; huoe'ama pocue pea'ai!

¹⁷Oya jayojjaya beca cuana poani: —Eya Jesosaja epeeji poani.

Jamatii Jesosaja esohui jayojja jama mi acanijo oya Jesosaja epeeji nei pojjeama.

¹⁸Onaya jjamimicuiajea nobiajeaquiani jama ba'a: —Eya Jesosaja epeeji. Eyacuiñajjiya esohui ecuea eba.

Pea ca ca jama poani ba'a: —Eyaya Eyacuiñajjiya esohui jayojja jama atiitiiaña.

Eyaya ca ca huohuaña jama ba'a: —Eyacuiñajjiya esohui jayojja jama a'ajjajo eyaya miquianaya baña Jesosaja epeeji pojjeama. Quea pame nee nee Eyacuiñajjiya esohui jayojja jama añajo ca ca ojjañaja eba eseya Jesosaja epeeji nei poani —jamaya eyaya aña.

¹⁹Miquianajaya eba Eyacuiñajji oe nei yani tii tii. Jamaya quea pame nee, e'e jojo nei poani. Jamaya eshahua cuanaja eba pea'ai, ma

Eyacuiñajji oe nei yani tii tii. Jamajjeya oya cuana quea mete tii tii poani, Eyacuiñajjiya oya cuana quea nee nee po mee caje'yo.

²⁰ Miquianaya jjashahuabaquiani quea quehua jama ba'a: —Eya Jesosaja epeeji poani.

Jamatii Jesosaja esohui quea pame jayojja jama a'ajja. Jamaya quea tai ba'yanijo miya Jesosaja epeeji pojjeama. Jamajjeya miquianajaya ejjashahuabaquijji eyaya jiquio esohui tehueaña esejaya etiiquiana Amajamajo. ²¹ Yahuaajo nei nei esejaya etiiquiana Amajamaa Eyacuiñajjiya esohui jayojja jama aca poa. Jamajjeya Eyacuiñajjiya oja mimishi cuana cuijea ca'ya poa. E'e, Amajamaa ojaya esohui a'a shajja'ajja caje ebajji Eyacuiñajjiya oya huohui ca poa jama ba'a: “Amajama, imiquea ebacua mei e'ia bialje jeyo majje yacuajecue, eya quiacue!” Amajamaa Eyacuiñajji shajja'ajja ca poa. Oja bacua ejja oe nei mei bialje jeyo majje Eyacuiñajji yasijje quia ca poa. Beshahua nei yacua ca'ya poa. Jamaya ojaya esohui ma ecua Eyacuiñajjiya huohui canaje jayojjaya Amajamaa aca poajo, Eyacuiñajjiya oya jama aca poa ba'a: “Amajama, miyaya ecuea esohui shajja'ajjañajo ecuea eba miya ecuea epeeji nei. Eyaya miquea mimishi cuana cuijeaje'yo”. Jamaya Eyacuiñajjiya aca poa.

²² ¿A'a miquianaya jjashahuabaquinaje Amajama Eyacuiñajjiya epeeji e'e jojo nei? E'e. Ohuaya huohui ca poa jama ba'a: —Eya Eyacuiñajjiya epeeji —aca poa.

Majoya ohuaya Eyacuiñajji shajja'ajja ca poa; Eyacuiñajjiya esohui jayojja jama aca poa. Jamajjeya oya e'e jojo nei Eyacuiñajjiya epeeji quea pame nee nee poa. ²³ Jamajjeya Eyacuiñajjiya esohui yahuajo nei jama poa ba'a: —Amajamaa huohui ca poa jama ba'a: “Eya Eyacuiñajjiya epeeji” aca poa Amajamaa. Majoya ohuaya Eyacuiñajjiya esohui jayojja jama aca poa pea'ai. Jamajjeya Eyacuiñajji Amajama nijje jama poa ba'a: “Miya ecuea epeeji e'e jojo nei. Jamajjeya eyaya miquea mimishi cuana cuijeaje'yo” —jamaya Eyacuiñajji poanaje.

²⁴ Jamajjeya eseya Eyacuiñajji nijje mimianijo, ojaya esohui jama añajo pea'ai, Eyacuiñajjiya esejaya mimishi cuana cuijea ca'yani. Jamaya eyaya miquianaya ba mee yaña.

²⁵ Oya jayojjaya yahuajo nei nei Shajami poa, Amajama jayojjaya poa. E'e, yahuajo nei nei oe epona Shajami yaña poa. Shajami Jodio pojjeama poa. Oya quea mimishi pea cojojji nei nei poa. Jamatii ohuaya Eyacuiñajjiya epeeji quea pame nee aca poa. Nahue ca poa sohuinano cuaa equecuaca'yo poanijje. Jamajjeya Eyacuiñajjiya oja mimishi cuana cuijea ca'ya poa. E'e, Shajamiya Eyacuiñajjiya epeeji becamejijji pea'ai quehuaje bobia ca poa, Jodio cuanaja esohui huohuijji cuana. Majoya oya cuana quehuaje poqui meesahua ca poa pea ejiojijje, onaa equecua ca poaje jjejojya. E'e, Shajamija ejjashahuabaquijji Eyacuiñajjiyo quea pame nee poa.

²⁶ Jamajjeya esejaya eba jama ba'a: Eseyaya edojjoshahua poqui'yo majje esejaya eyami ihuije'yo, cajaa. Oya jayojjaya ojjaña joya

Eyacuiñajjiya esohui shajja'ajja majje jjashajja'ajjaqui ajja poani maya Jesosaja epeeji pojjeama, cajaa pea'ai. Ehuohuijeajjiya huohui cani jama ba'a: —Eya Jesosaja epeeji poani.

3 ¹Ecuea epeeji cuana, ¡shajja'ajjacue mo oe! Esey a quea mimishi poajo, Eyacuiñajjiya tecuea caje'yo. Jamaya miquea eba. Eyacuiñajjiya esohui huohuiji cuana quea mimishi poajo ca ca Eyacuiñajjiya oya cuana tecuea neinei cañaje'yo janobajjima nei. Jamajjeya oe ¡a'a eseya quea huiso Eyacuiñajjiya esohui huohuiji po sa pojji!

Beca cuanaja chama' esohui jjochijji

²Ojjaña pojajajo eseya quea mimishi pishana poani. Joya esohui quea mimishi mimi ajja tii tii, mimijjequijjequi'yo ajja poani ca ca ojaya ejjashahuabaquijji quea ja'a nee poani tii. Jamajjeya oya quea pame tii ba'yani. ³Eseyaya baacui sisi mapichija enaba huasijje huananobiaña ehui jjequijea poquiajji. Majoya eseyaya mapichi poqui meeaña cua ese poqui sa poaje yasijje. Jamatii baacui enabajo che biso nei ba'yani.

⁴Oya jayojjaya bishe quea quemo quea cuejipashi nei poquiani. Jamatii ebishe meseya bishe quijo aniya bishe dojo cani cua o poqui sa poaje yasijje, quii ca'a cani, jamatii equica'ajji biso neiya.

⁵Jiquio ecua bishe quica'ajjiya bishe ai huijeda cani jama jamatii che biso neiya jayojja jama esejaya enaba quea biso, jamatii beca cuana quea huiso esohui quea tecue mimiani. Quea miminaa poani bicho'ama.

¡Jjashahuabaquicue cuaquijo pea'ai! Cuaqui cojjasha sisiya quijjo'yo jjimaa ebio quea jabo dahuaquea cani, ebio quea quemo. ⁶Ma jayojjaya beca cuanaja e'ana quea mimishi mimimimianijo yana cuaqui jayojja jama poani. Jamajjeya jiquio ecua cuaquiya ebio dahua tehuejeda cani, acui cuana quea tehue po mee cani jama jayojjaya esohui quea mimishi mimianijo ejjashahuabaquijji quea tai po mee cani. E'e, esho'iquiana quea tai mimiani; tii majje quea tai mimiani pea'ai, quea mimishi. E'e, eshahua cuaa eseya quea tai nee nee mimi mee cani. Jamajjeya Eyacuiñajjiya ojjaña joya quea mimishi mimiani quea nee nee po mee caje'yo. ⁷¡Bacue! Eseyaya ojjaña ijjiacajji cuanaja ebacua huoniaña. Ijjiacajji mase cuanaja bacua cuana, cuichojjiya bacua cuana huoniaña; shaneija bacua cuanaya huoniaña, nahuoo jai besijji cuana pea'ai. Jjabahuonequi meeaña. ⁸Jamatii esejaya esohui quea tai, quea tecue ca ca quea mimipanajea epojji chama' esohui jjochijji, ca pea nijje emimijaji pajea'yojji. Jiquio ecua peyoja ese na jama quea nee nee poani jama esohui quea taijoya pea epeeji cuana quea yeno nee nee po mee cani. ⁹Eseyaya aje oe Eyacuiñajji, esejaya Chii ai bihuiaña esejaya enabaa. Jamatii majoya eseya pea cuana nijje mimijajiani, ma Eyacuiñajjiya pana ca poa o jayojja epojji nijjeya eseya mimijajiani. Jamaya quea tai. ¹⁰E'e, esohui quea bei, quea pame mimi majje quijje pishana esohui quea tecue nee nee, quea mimishi nee mimiani pea'ai. Ecuea epeeji cuana, ¡a'a oe jamaya pojji! ¹¹¡Jjashahuabaquicue! Ena teohuejja cajje ena ihui'ama cuayani, sese'ama. Ena

sese ena quea pame tejje teohuejja cajje cuaya ajja. Jiquio ecua ena quea pame cuaya majje ena sese cuaya ajja jayojja jama pojjeama esejaya enaba. Esohui quea pame mimi majje esohui quea mimishi mimiani, ena sese jama cuayani esohui. ¹²Epeeji cuana, miquea eba jememe acuijo chama' esiy. Jememejo tii ajja esiy. Jjono cuanajo tii ajja acuijjajja, shihuijjajja pea'ai. Oya jayojja meshi eteohuejjajje ena quea pame cuayani; ena sese cuaya ajja. Jamajjeya esohui quea pame mimi majje ¿apiojji acuae nequiana esohui quea mimishi mimiani, pea cuana niñebaña pea'ai? Jamaya se quea pame pojjeama nee nee.

Eyacuiñajjiya eseya quea ja'a jjashahuabaqui mee cani

¹³¿A'a miqianaya quea ja'a jjashahuabaquiani? ¿A'a jjabahuejjaquinaje quea pame nee eba'ejji? Jamajjeya ¿quea pame nee atiitiicue! ¡Tecue'ama pocue! Quea pame nee añajo pea cuaa ba caje miqianajaya ejjashahuabaquijji quea pame nee poani. ¹⁴Pea cuanajo quea quene nee nee jjashahuabaquianijo, quea nishehui, quea dejja tai nee nee poanijo pea'ai ¿quea yeno pocue miqianajaya mimishijo! ¡A'a sijje pojji Eyacuiñajji nijje jama ba'a: —Eya quea pame nee ba'yani —a'a jama sijje pomeya pojji! Chojja.

¹⁵Ojjaña joya quea tecue nee nee, quea nishehui pea'ai poani Eyacuiñajjiya Edojjoshahua Pame jayojja jama jjashahuabaqui ajja. Chojja. Oya cuana eshahua ejjashahuabaquijji jayojja jama poani quea mimijjequijjea, quea mimishi. Mimishi cuana Eyacuiñajjiya esohui jayojja jama po ajja tii tii, Eyacuiñajjiya epeeji pojjeama. ¹⁶Quea tecue po tiitiiianijo, quea nahue po tiitiiianijo pea'ai ojjaña peapea mimishi cuana acani tii tii pea'ai. Quea ja'a ba'e ajja. ¹⁷Eyacuiñajjiya ejjashahuabaquijji quea pame nee nee. Ojaya ejjashahuabaquijji jayojja jama jjashahuabaquianijo eseya mimishi'ama poaje: Quene'ama. Nishehui'ama, dejja tai'ama. Shajjama' pojjeama. Quea bei poaje. Quea pame nee poaje'yo tii tii pea'ai. ¡A'a oe nei dejja quea jea ajji; ojjaña cuana oe quea jea acue! ¡Jesosaja epeeji e'e jojo nei pocue pea'ai, epeeji nisho pojjeama! ¹⁸Jamajjeya ¿quea bei nee ba'ecue! ¡Pea cuana quea bei ba'e meesahuacue pea'ai! E'e, eseye nei quea bei poanijo, quea pame nee poanijo pea'ai, pea cuana quea pame nee poaje ese jayojjaya.

¡Jesosaja epeeji pojjeama jayojja jama a'a ba'ejji!

4 ¹¿Apiojji acuae quiana esohui quea tai nee nee mimiani so'o Jesosaja pea epeeji cuana nijje? ¿Apiojji acuae quiana jjamimicuijjea nobiajjeaquiani pea'ai? Ecuea eba. Miqianaya quea huiso aquiana jea bañajo quea tecue nee nee poani, quea dejja tai poani pea'ai. ²Miqianaya ca ca oe quea aquiana huiso po sa poani. Jamatii ejjeshejji chamajojo ca ya ca oe mi jjesheaña. Jamajjeya ajeo ejjeshejji pojjeamajojo ca ya ca oe pea quecua sa aña e'aquiana mejo'yojji. Onajaya aquiana jea ba majje miqianaya jjamimicuijjea nobiajjeaquiani; jjacuiaquiani pea'ai. Jamatii miqianaya Eyacuiñajji nijje mimi ajja jama ba'a: —Eyacuiñajji,

¡che mo ma aquiana jjeshe meesahuacue! —jamaya Eyacuiñajji nijje mimi jjimajojo ca mi ca mi jjeshe meesahua cani aquiana cuana.

³Beca cuana aje oe Eyacuiñajji nijje mimiani aquiana sa poanijo. Jamatii ma aquianajo quea nahue nee poanijo ojaya miquianaya ma aquiana equia meejji pojjeama. Aquiana miquea miqueya nei epojjijo quea tai jjashahuabaquiani. Eyacuiñajjija ejjashahuabaquijji jayojja jama a'ajjajo ojaya miya eshajja'ajjajji pojjeama. ⁴¡Bacue! Jiquio ecua ehuanase ojaya yahue boti'ama amajje pea dejja nijje poani jama jayojjaya miquianaya Eyacuiñajji nijje jjapeepajeaqui'yani mimishi cuana nijje ejjapeequi'yojji. Jamajjeya miquianaya Jesusaja epeeji pojjeama cuana nijje jjapee neineiquianijo miquianaaya Eyacuiñajji boti'ama año. Quea mimishi ba'e sa poanijo Eyacuiñajji quecua'yojji jayojja poani.

⁵Eyacuiñajjija esohui yahuajo nei nei tehue ca poa cuaa jama ba'a:

“Eyacuiñajjiya ojaya Edojjoshahua Pame ojaya epeeji cuana huasijje huoojea ca'yonaje ojaya eyami yasijje dobiquiya. Edojjoshahua Pameya ojaya epeeji cuana nahue tiitii cani mimishi'ama epojji”.

Jamaya yahuajo nee tehue ca poa. ¿A'a Eyacuiñajjiya ma esohui etehuejeajji tehue mee ca poa posoya año miquiaaya?

⁶Eyacuiñajjiya eseya jaahuana cani quea ja'a nee. Ohuaya eseya ba'e meesahua cani quea pame nee. E'e, ojaya esohui yahuajo nei tehue mee ca poa jama ba'a:

“Eyacuiñajjiya ojjaña joya mimishijo bicho'ama poani, quea quene poani pea'ai jeabichajea cani. Quea yeno nee nee po mee cani pea'ai. Ojjaña quea bei poani, quene'ama poani pea'ai ohuaya ba'e meesahua cani quea pame nee”.

Jamaya yahuajo nei tehue mee ca poa.

⁷Jamajjeya oe ¡Eyacuiñajjija esohui jayojja jama pocue! ¡Edosiquiana nei nijje a'a jjapeequijji! ¡A'a oya shajja'ajjajji! ¡Oya huoojeacue! Jamajjeya miquianaya Jesusaja epeeji poanijo Edosiquiana miquiana huoojeajji pojjeama poani. Chojja, jjanequishiñaqui majje oya poquije quea huesha nee. ⁸¡Jesusa nijje jjapee neineiquicue! Jamajjeya ohuaya miquianaya jaahuana tiitii caje'yo. ¡Miquea mimishi cuana pajea nei'yocue! ¡Jesusaja epeeji nisho a'a pojji! ¡Ojaya epeeji nei nei oe pocue Eyacuiñajjija esohui etehue'yo jayojja jama! ¡Quea boejea ba'e neinei'yocue! ⁹¡Miquea mimishijo quea yeno nee pocue! ¡Pa neineicue! ¡Mimishi cuanajo quea bihui jayojja a'a soajji! ¡Mimishi cuana amajje a'a quea bei jayojja pojji! Chojja. ¹⁰Quea tai po majje quea bicho nee nee mimicue Eyacuiñajji nijje jama ba'a: —Eyacuiñajji, ¡eya mimishi pajea meesahua'yocue! E'e, eya ca'a'ama. ¡Jaahuana neineicue mo oe, quea bei enijje pocue!

Jamaya onijje mimianijo Eyacuiñajjiya miquianaya shajja'ajja caje. Miquianajaya emimi onijje jayojja jama ohuaya acaje.

¡A'a pea cuanajo maimajji!

¹¹ Ecuea epeeji cuana, miquianaya Jesosaja epeeji cuana poani. Jamajjeya ¡Jesosaja pea epeeji cuana a'a niñebajji! Jesosaja epeeji cuaa, beca cuaa pea epeeji niñeba caní jama ba'a: —Oya Jesosaja epeeji quea pame pojjeama —jamaya acani Eyacuiñajjija esohui jayojja jama a sa po'yo ajjaa jjejojo.

Jamajjeya ohuaya Eyacuiñajjija esohui niñeba caní jama ba'a: —Eyacuiñajjija esohui quea pame pojjeama poani.

Ohuaya Eyacuiñajjija esohui jayojja jama a'ajja boti'ama jojoya. Jamajjeya oya cuana Eyacuiñajjija esohui niñebajji poani. ¹² ¡Bacue! Eyacuiñajji oe nei ojjaña huoojeajji poani quea pame nee. Oya oe nei quea ja'a nee nee jjashahuabaquiani ojaya epeeji cuanajo. Ohuaya ohuaye nei mimishi cuana cuijea ca'yani. Jamajjeya ohuaya ohuaye nei mimishi cuana quea nee nee po mee caje'yo tii tii. Jamajjeya ¡a'a pea epeeji cuana niñebajji! Miya ca ca Eyacuiñajji jayojja jama pojjeama.

¡Eyacuiñajjija ejjashahuabaquijji jayojja jama acue!

¹³ Beca cuana mimiani jama ba'a: —Mecahuajje pojja'a eya poquije pea cuiñajji yasijje. Jocuama eya nequije oe shequijame. Chacochaco majje ejjeshejji quea huiso jjesheje —poani.

¹⁴ ¡Eya shajja'ajjacue! ¿Ae shai poaje mecahuajje? Miquianajaya eba pojjeama. ¿Ache shono manoj'e'yo eseya? Esejaya ba jjima. ¡Bacue! Eseya huoja jama. Jiquio ecua eshequi jaasohua pishanajo huoja jjachamaqui'yani, poquiani jama jayojja miquianaya jiquio meshijo enequi tiitiijji pojjeama; ca'a'ama. ¹⁵ Jamajjeya jama pocue ba'a: —Eyacuiñajjija ecuana ba'e meesahua canijo, ecuana ba'eje quea pame nee. Ohuaya ecuana chaco sahua canijo, ecuaaya chacoje ma echacojji.

¹⁶ Jamatii miquianaya bicho'ama mimiani jama ba'a: —Eya jamatii quea pame chacochacoani. Quea pame ba'yani jamatii.

Chojja. Miquianaya emimijeajji mimijeani. Jjashahuabaquiani quea quehua nee nee.

¹⁷ Eyacuiñajjija ojjaña quea pame nee ameesahua sa acani. Ma ba majje jamatii beca cuana quea pame po sa po'yo ajja. Jamaya poani jjejojya quea mimishi nee nee poani.

Dejja quea aquiana huiso niñeshe'ajji

5 ¹ Quea dejja tai jjejojo ona dasiajji poani, ¡shajja'ajjacue mo oe! Jjeya miquianaya quea aquiana huiso poani. ¡Jamatii quea yeno nee nee pocue, pa neineicue pea'ai! Quijje aje oe quea yeno nee nee poaje, quea camaja nee poaje'yo. Quea nee nee poaje'yo miquianaya. ² Miquianajaya aquiana quea nahue cuana shaashaajeaje quea huiso. Mojojea caje. Miquea daqui quea nahue cuana huiñajeaje'yo, machichi aiya ijiahuiñajea caje'yo quiiteteya pea'ai. ³ Miquea aquiana mei huo'o quea nahue cuana, mei oshe quea nahue cuana, bejjo cuana

pea'ai seejeaje'yo. Miquea aquiana cuana esee'yo, ehuiñajea'yo ba majje onaaya miya jama acaje ba'a: —Oya quea dejja tai; oya quea nishelui poanaje. Quea aquiana jeaa jjejojo aquiana quea huiso nee nee nahue tiitii canaje.

Miquea ejjeshejji chama'yo tii poaje'yo. Jiquio ecua cuaquijo quiyo'yo majje eseya quea nee nee poani jama jayojja miquea aquiana cuana chama'yo tii poajo miya quea yeno nee nee poaje'yo. Majoya Eyacuiñajjiya miya tecuea caje quea dejja tai poanaje jojoya, aquiana cuana quea huiso nee chicha majje nahuejje poanaje jojoya. ⁴E'e, echacojji cuana mique que cuanajo chachaco'yonaje miquea sosequia'yo jjima. Ma echacojji cuana Eyacuiñajji nijje mimiani mijo; huohui cani, sosema' miya chaco mee canaje jjejojo. Onaaya mique que cuanajo bobi sosema' chicha ca'yonaje pea'ai. Majoya oya cuana taaani Eyacuiñajji yasijje mimi majje miquea sosequia'yo jjima jjejojo. Eyacuiñajji quea ca'a nee nee, ojjaña huoojea'yojji nei nei oya poani. Ohuaya echacojji cuana pa ani shajja'ajja canaje. Jamajjeya ohuaya miya tecuea cani quea dejja taijojo. ⁵E'e, miyaya aje oe aquiana quea huiso jiquio meshijo chichanaje; miquea yajjijo quea huiso aquiana pame, quea nahue nee pea'ai chichanaje, siñaje pea'ai. Quea aquiana jea nee nee poanaje. Quea bobi huiso nee nee miya poanaje. Jamatii jeje ajja tii tii poanaje. Quea dejja tai poanaje; quea nishelui poanaje epona. Jamajjeya Eyacuiñajjiya miquianaya quea nee nee po mee caje'yo. ⁶Miyaya aje oe aema' cuana, joya mimishi'ama quea pame nee poani pea'ai tecueanaje. Oya cuana quecuajeanae pea'ai. Jamatii oya cuana minijje jjasoseaqui'yo ajja, jeabichajea sa po'yo ajja pea'ai. Eyacuiñajjiya ca ca oe miya quea nee nee po mee caje'yo tii tii ona miya mi sosequiajo. Jamaya eyaya miquianaya aña, edejja tai cuana. Mahuiso.

¡Eyacuiñajji nijje mimicue eba'e meesahuajji!

⁷Jamajjeya ecuea epeeji cuana, ¡Jesosaja epoe o'oyajjijo jja'ishoa'ajjaqui nequicue quea bei! Onaaya miquianaya quea mimishi acanijo, ¡jamatii Jesosa nijje jjapee tiitiiquicue yeno'ama! Eseyaya shijje quecua majje ishoa'ajjaña shijje tii'yajo eso' yajji. Jiquio ecua seya ena ishoa'ajjaña shijje pohua'yojji jama ¡ishoa'ajjameya acue Jesosaja epoe o'oyajjijo! ⁸E'e, quijje pishana esejaya Emeshi Mese nei Jesosa poeje o'oya. Jamajjeya oe ¡jjeaya quea pame nee onijje jjapee neinei tiitiiquicue e'e jojo nei!

⁹Ecuea epeeji cuana, ¡a'a Jesosaja pea epeeji cuana niñebajji Eyacuiñajjiya miquianaya etecueajji pojjeama! Poe majje Jesosaa huohui cañaje'yo joya quea pame poanaje; joya quea mimishi poanaje huohui cañaje'yo pea'ai. Jjeyahua nei esejaya Emeshi Mese nei Jesosa chipi nei nequi. Jjeyahua nei pojja'a oya poeje o'oya.

¹⁰Epeeji cuana, ¡shahuabacue Eyacuiñajjiya esohui huohuijji cuana ma yahuajo nei nei ba'ya poa! Ohuaya esejaya Emeshi Mese neijo huohui ca poa. ¡O jayojjaya jama quea bei pocue! E'e, yahuajo onaaya oya cuana cuia ca poa pea'ai. Jamatii Eyacuiñajji nijje jjapee tiitiiqui nequia poa.

¹¹ E'e, oya cuana napa ca poa cuaa quea huiso. Jamatii Eyacuiñajji nijje jjapeequi pajea'yo jjima poa. Jamajjeya eseya jama poani ba'a: —Oya cuana Eyacuiñajji epeeji quea bihui neeya poa, ma etiiquiana cuana.

E'e, ¡niñeba'yocue Eyacuiñajji epeeji yahuaño nei nei nequia poa etiiquiana! Jobi bojojea'ajja'ya poa; quea nee nee poa. Jamatii Eyacuiñajji nijje jjapeepajeaqui'yo jjima poa. Jamajjeya Eyacuiñajji oya quea pame nee aca poa. Jjajea meequi ca'ya poa. Jamaya miquea eba. Eyacuiñajji eseya quea jea nee poanijo quea pame nee nee acani, quea bei pea'ai.

¹² ¡Jiquio ecuea pea esohui ba neineicue, epeeji cuana! ¡A'a oe sijje pojji! ¡A'a oe jama pojji ba'a: —Eyacuiñajji eya ba canijo, eyaya e'e nei huohuiana. Ecuea esohui e'e nei pojjeama jójemo eya Eyacuiñajji quea nee po mee ca'yome. Ojjaña eyajo ba'e cuaa eya ba cani, ojjaña meshijo ba'e cuaa eya ba cani pea'ai eyaya e'e nei huohuiana. Ecuea esohui e'e nei pojjeama jójemo Edosiquia eya quea mano po mee ca'yome —a'a jamaya pojji!

Chojja, ¡esohui e'e nei huohucue jama tii tii! Jamajjeya ¡chaco sa poanijo jama acue ba'a: —E'e, eyaya chaco sa aña —acue! Chacochaco sa po ajjajo ¡huohucue jama ba'a: —Chojja, eya chacochaco sa po'yo ajja —acue! ¡E'e jojo nei oe huohui poquiacue! ¡E'e jojo nei jayojja mimianijo Eyacuiñajji miya tecuea ca'yo chana'!

¡Eyacuiñajji nijje mimicue emanojaa oja ehuaquia mee'yojji!

¹³ ¡A'a beca cuana quea yeno nee nee yani? Quea yeno po majje ¡Eyacuiñajji nijje camimiahua! ¡A'a pea cuana quea bihui nee poani? Quea bihui nee po majje ¡Eyacuiñajji cabihuia cahua sohuicuayanijo! ¹⁴ ¡A'a emanojaa yani? ¡Eyacuiñajji epeeji etii cuana ca'iyaa cahua! Oya cuana poe majje Eyacuiñajji nijje mimije emanojaa huaquia mee'yojji. Jamajjeya emanojaa bahua shicui caje acuijjajja seiya Jesosaja epeeji poanijo. Majoya Eyacuiñajji nijje mimije emanojaa huaquia'yojji, ejjaajaqui'yojji pea'ai. ¹⁵ Eyacuiñajji nijje mimianijo cajjashahuabaquiahua jama ba'a: —Ecuana Eyacuiñajji nijje mimiani emanojaa oja ehuaquia mee'yojji. Ohuaya e'e jojo nei ecuana shajja'ajja caje; emanojaa huaquia mee caje'yo —jamaya capohua.

Jamaya jjashahuabaquianijo, Eyacuiñajji eseya onijje mimiajo shajja'ajja caje; jamaya acaje'yo e'e jojo nei. Emanojaa quea mano poani oja mimishijo, Eyacuiñajji oja mimishi cuana cuijea caje'yo pea'ai. ¹⁶ Jamajjeya mimishi amajje ¡quea yeno nee mimicue pea cuana nijje! ¡Miquea mimishi huohucue! Jamajjeya Jesosaja pea epeeji cuaa miquiana mimishi apajea meesahua caje'yo. Majoya ¡mimicue Eyacuiñajji nijje pea cuanajo! Eyacuiñajji miquianaya huaquia mee caje'yo. E'e, Jesosaja epeeji mimishi'ama Eyacuiñajji nijje mimi neineiyajo Eyacuiñajji oya shajja'ajja caje; jamaya acaje ojo.

¹⁷ Yahuaño nei nei esejaya etiiquiana Enia bajjani ba'ya poa. Oya ese jayojjaya poa. Jamatii oya miminequia poa Eyacuiñajji nijje ena chama' epo mee'yojji.

Jamajjeya ena chama' poa beshahua nei ebeca pea pea'ai shequijame.

¹⁸Meshi quea jabo nee nee poajo, Enia Eyacuiñajji nijje mimi o'oya poa ena epo'yojji. Eyacuiñajjiya Enia onijje mimiajo shajja'ajja ca poa; ena quea quemo po mee ca'ya poa. Eso' cuana equecua ani pohua mee ca'ya poa.

¹⁹Ecuea epeeji cuana, ¡bacue! Jesusaja epeejiya Eyacuiñajjiya esohui etehue'yo jayojja jama ba'e pajea'yajo, ¡oya quea pame nee ba'e meesahua o'oyacue miquianaaya! Jamajjeya Eyacuiñajjiya esohui jayojja jama acaje o'oya ohuaya. ²⁰Jamajjeya Jesosa nijje jjapeequi meesahua o'oyañajo, oya cuana cuaqui yasijje epoqui'yojji pojjeama. Eyacuiñajjiya ojaya mimishi quea huiiso cuana cuijea caje'yo.

Mahuiso ecuea esohui. Eyaya, Satiacohua esohui tehuenaje. Apoa.